

čo. 105: „Při wólbje na pruski sejm w našim wokrjesu bě pt. Kuhring wuprajił, zo njeje dr. Andrä tón žadlawy nastawk „Šlezynskeje nowiny“ pisał, w kotrymž buchu na naše sprawne serbske mjeno žadlawe přisłóženja wuprajene. Přez tute Kuhringowe wuprajenje smy so někotři zawjesé dali, za dr. Andräa hłosować. Dokelž pak je nětko na zjawne přišło, zo je Kuhring derje wědzał, zo je z njewěrnosću za dr. Andräa tamne zawjědžace zamółwjenje wuprajił, dokelž je dr. Andrä tamny nastawk z Kuhringowej pomocu woprawdže pisał, dha sebi žadamy, zo by dr. Andrä swój přez nas dostaty mandat jako zapóslanc zložil. Na jeho město chcemy zaso našeho přjedawšeho swěrneho zapóslanca, knjeza rytmištra z Götz nad Němješkom wuzwolić. . . . Hdy budžeše knjez z Götz naš zapóslanc za pruski sejm wostał, budžeše z wěstosću tež knjez wyšši praesident ze Seydewitz zaso naš zastupjer na kejžorstwowym sejmje był.“

Na to je dr. Andrä spočatk januara 1885 w Rózborskich a Mužakowskich němskich nowinach so wusprawnić pytał powědajo, „zo je so přez zdaće k njeprawym wuprajenjam torhnuć dał, štož nětko sprawnje wobžaruje“. K tomu někotři jeho wolerjow w „Serbskich Nowinach“ 1885 čo. 3, str. 19 mjez druhim přispomnjeju: „Štó dha je jemu kazał, njeprawe sudženja činić? A hdyž bě te same činił, dha běše to jeho swjata přislušnosć, zo by w „Šlezynskeje nowinje“ tuto swoje błudjenje wróco wzał. Ale to wón njeje činił! Wón jara derje wě, kak wulku škodu je našemu Serbowstwu přez tamny swój njewěrnny nastawk načinił, a potom chce hišće nas narěčeć, zo ma ćopłu wutrobu za naše Serbowstwo abo za naš serbski lud?! My při tym wostanjemy, zo dyrbi dr. Andrä swój mandat zložić.“ — Hač je wón to činił abo nie, njejsmy dotal zhonili.

Skóržby a powěsće wo potłóčowanju Serbowstwa w šuli a cyrkwi poskića Imišowa kniha mnohe; k tomu namakaju so wšělake w serbskich nowinach a časopisach wot l. 1874—1884, z kotrychž su najwažniše: 1. we Łužičanu 1879, str. 23 sl. Słowo wo bėdnym mužu; 2. we Łužicy 1882, str. 26 Suum cuique! str. 45 přispomn.; 3. we Łužicy 1883, str. 72 Duchowna nuza; str. 78 πῶς γὰρ οὐ; 4. w Serbskich Nowinach 1880, str. 120; str. 195; str. 206; str. 224; str. 290; str. 434.

*